

Ang Mahiwagang Bulaklak ng Matandang Babae

Noong unang panahon, may isang matandang babae na may magandang hardin ng mga bulaklak sa tabi ng lawa.



Malapit ang matandang babae sa mga mangingisdang naninirahan sa kalapit na baryo.



Madalas na bumibisita ang mga mangingisda at ang kani-kanilang pamilya sa matandang babae upang magbigay ng isda kapalit ng ilang magaganda at mababangong bulaklak mula sa hardin.



Naniniwala ang mga mangingisda na mayroong angking kapangyarihan ang matandang babae dahil palaging nagliliwanag ang kapaligiran na may kasamang magandang babae at duwendeng tumutulong sa pag-aalaga ng mga tanim. Sinubukan nilang tanungin ang matanda ngunit

sinabi ng matanda na wala siyang kasama.



Isang araw ay may isang mag-asawa ang bumisita sa baryo at nakita nila ang magandang hardin. Pumasok sila at pumitas ng bulaklak ng walang pahintulot, nakita sila ng matanda at pinakiusapan silang umalis ngunit pinagkatuwaan lamang dahil sa pangit nitong anyo.



Dahil sa kalapastanganan ng dalawa, ginawa silang magandang kulisap. Noon din ay nagbago ang anyo ng dalawa naging paru-paro at nakita lamang ng mga taumbayan na may kakaibang kulisap na aali-aligid sa mga bulaklak.

